

Testimonio iti Pannakapaimbag

(Naipatarus manipud Portuguese)

Oktubre 27, 2014

Ti naganko ket Pastor Isaque Roberto. Naggapuak idiy Lonrina iti Estado ti Paraná, Brazil, ket kayatko iti mangibingay iti maysa a banag babaen iti daytoy nga email. Pastorak idiy Londrina iti agarup 15 a tawenen. Tallo a tawen ti napalabas ti familiak ket napiglitan iti nakaal-alinggaget, ngem dakkal a pasamak.



Idi Hulyo 24, 2011, ti anakmi a babai a ni Beatriz Gabriela (iti tawen a pito), nagdalan iti seryoso nga aksidente idi nadungpar isuna ti agmanmaneho iti taxi kas magmagna iti pagballasiwan. Napigsa unay ti pannakadungparna ta segun kadagiti imbestigador, naipurwak isuna iti agarup 6 a metro. Timmarayak iti sibayna, awan ti angesna ket malagipko a nagpukkawak, “Umawagkayo iti tulong!” Idi kimmitaak manen kenkuana, nakitak ti dalig ti motorsiklo ken iti boses a nagkuna, “Tumulongak. Maysaak a bumbero.” Iti dayta a kanito, inkabil ti Dios dayta immuna a timmulong sadiay. Impaiddana ni Beatriz sananto inaramid ti CPR, ket naguyek isuna iti dara. Simmangpet ti tulong, ket kabayatan

a tamtamingenda isuna idiy uneg ti ambulansia, rinuggiak ti nagkararag. Kinomfrontarnak ti diablo ken impakitana kaniak iti panunotko ti imahe ti maysa nga am-ammok nga ubing a lalaki a nadungpar met iti lugan ket napukawna ti abilidadna nga agsao ken aggaraw. Iti agdama isu ket bagbagkaten ti familia babaen iti wheelchair. Iti dayta a kanito, iy-iyeg ti diablo ti imahena kaniak ken ibagbagana, “Dayta ti pagbanaganto ti anakmo a babai.”

Naiyapan isuna iti ospital ken naadmitar kadagiti sumaganad a nasukimat: natukkol a kannigid a saka, natukkol a kannigid a takyag, natukkol a kannigid ken kannawan nga abaga, nasugatan a pali, nadisporma a bara ken maikatlo a tukad a trauma iti ulo (ti maikapat a tukad ket patay).

Idi simmangpetkami idiy intensive care unit, nakitami ti anakmi a babai a naikonekta kadagiti makina, agang-anges babaen iti maysa a makina, ken na-koma. Tallo nga aldaw kalpasan ti aksidente, idi maika-27 ti Hulyo, inayabannakami ti neurosurgeon a mangtamtaming kenkuana ket kunana, “awan ti nasayaat a damag a maibagak. Kimmaro ti situasionna. Saan nga agresresponde ni Beatriz kadagiti medikasyon, ken naaddaan pay iti cranial hypertension. Lumlumteg ti utekna. Gapu iti dayta, saan nga agay-ayus ti dara iti utekna, ken iti sumaruno a sumagmamano nga oras, matayton ti utek ni Beatriz.” Imbaga ti doktor, “Addaanak iti maysa laengen a maudi nga alternatibo, isu ti panang-opera tapno maikkat ti paset ti bungo iti agsinnumbangir tapno mapababa ti presyon iti utek ni Beatriz, tapno adda ti lugar a pagukradanna. Nupay kasta, awan kasiguraduan nga agbaliw ti kondisyonna wenna madaeranna ti operasyon.”

Pinalubosanmi ti operasyon, gapu ta ammomi a ti maudi a sao ket agtaud iti Dios. Kabayatan nga isagsaganada amin a banag, imbagada nga agtalinaedkami iti ayan ni Beatriz tapno maibagami dagiti panagpakadami. Nangrugi a nagkararag ni baketko kabayatan a taw-tawagak dagiti dadduma a mangibabaet ken impalawagko ti situasion. Kabayatan nga isangsanggir ni baketko ti bagina ken ni Beatriz kas agkarkarag isuna, adda tao nga immay kenkuana ket kinunana, “Inang, isingasingko kenka nga ikararagmo iti Dios nga alaennan isuna, gapu ta no makalasad isuna, agbalin laeng a

baldado iti pagiddaan.” Kalpasan ti sumagmamano nga oras nga awanan pannakaammo no ania ti napasamak, nakaawatak iti mensahe iti teleponok manipud iti ipagko a nagkuna nga agkarkararag isuna kabayatan ti malem ket naaddaan isuna iti sirmata. Nakitana ti dakes nga espiritu a napan iti asawak ket imbagana dagita nga eksakto a sasao.



Nagpaot ti operasyon iti agarup lima nga oras. Idi inyapanda ni Beatriz iti intensive care unit, nabalkot ti entero nga ulona ket nadisporma ti rupana. Ti laengen aguray ti maaramidak. Inkararagmi iti Dios nga agasanna isuna, ngem agtultuloy nga um-umay ti dakes a damag—numonya, ti impeksyon ti ospital.

Maysa nga aldaw sakbay ti panagkasangay ni Beatriz (maika-8 iti Agosto), imbaga ti doktor nga isardengnan dagiti agas a pangpaturag tapno kitaenna no makaruar isuna manipud iti koma. Sinaludsodko, “kasano kabayag iti panagkunam sakbay a makariing isuna?” “Awan ti wagas a maamoantayo dayta,” kunana. “Mabalin a makariing isuna tatta, no bigat, no sumaruno a lawas, no sumaruno a bulan, sumaruno a tawen, ngem mabalin met a saan isuna pulosen a makariing,” dayta ti pananggupgopna.

Sumagmamano nga aldaw kalpasan, naikkaten ti artificial breathing machine. Nagrambakkami ta nangrugi isuna nga agriing. Nupay kasta, kabayatan iti rabii, nakasinglot iti likido ni Beatriz ket immalas ti panagangesna. Idi simmangpetkami iti ospital, nakitami isuna a marigatan nga aganges. Ar-aramiden dagiti medical team ti amin a kabaelanda tapno sumayaat ti panagriknana. Rimmuarkami tapno mangngaldaw, ket idi agsublikami ket kiddawenmi ti sumrek, pinagelandakami. Kimmitaak iti ruangan ket naipalikmot ti entero a medical team iti katrena ket agsasangitda. Kinasapulanmi ti sumagmamano a minuto a naguray, ket idi napalubosankamin a sumrek, nakitami manen a naikabil ken ni Beatriz ti pagangesan a tubo. Imbaga ti maysa kadagiti doktor, “Mabalin a kasapulanmi nga aramiden ti tracheotomy, ket kasapulan nga angesen ni Beatriz ti oxygenna babaen iti tubo. Mabalin nga awanton ti abilidadna nga aganges iti bukodna.” Ad-adu manen a dakes a

damag—sabali manen a rason tapno agkararag. Sumagmamano nga aldaw ti napalabas, nakariing ni Beatriz manipud iti pannaka-komana ket naiyapan iti infirmery.

Intultuloymi ti imkis iti Dios ken iti kankanayun nga agayunar. Idi napan ni Beatriz iti infirmery, inaramidmi ti kwarto kas sentro a pagkararagan, 24 nga oras inaldaw. Addaankami kadagiti pagdayaw a kankanta nga agtuktukar. Nagkarkararagkami iti tunggal oras. Sumrek dagiti tao ket makitada ni Beatriz a nakaidda iti katre a ti sakana ket nasimento, nakakonekta iti makina a pagangesan ken panganan ket ibagbagada, “Kasano nga adda ti dakkel unay a kappia iti daytoy a lugar?” Iti amin—amin, adda ti 53 nga aldaw a pannakaospital na.

Idi nairuar ni Beatriz, nagawid isuna nga awanan iti aniaman a senyales ti panagimbag. Addaankami iti katre ti ospital, tugaw a pagdigusan, ken wheelchair idiy balay. Makitungtungtung ti asawak iti physical therapist ket sinaludsodna, “Doktor, iti panagkunam kasano kabayag sakbay a makapagna manen ni Beatriz?” Insungbat ti doktor, “Nabayagen nga addaak iti daytoy a trabaho, ket awan pay pulos nasarakak a babasaen iti mediko wenno istoria a nangngegko maipapan iti siasinoman a nakalasad iti aksidente a kas napadteng ni Beatriz. Mabalin nga addanto ti aldaw a makapagna isuna babaen iti sarukod wenno walker, ngem iti makapagna manen a normal—iti panagkunak—saanen pulos.” Nupay kasta, inkeddengmi iti espiritumi a saan nga agbanag iti kasta a wagas. Intultuloymi ti nabileg a panangsapul iti Apo, no dadduma iti pammati, no daddumaa iti panagsangit, ngem kankanayon nga addaan panagtalek. Iti maysa nga aldaw inyapanmi isuna iti klinika ti komunidad gapu ta kasapulanmi ti referral, ket imbagak iti doktor nga masapul unay daytoy. Kiniddaw ti doktor a kitaenna ni Beatriz, ket idi simrekak iti opisina nga iggemko isuna iti imak, sinaludsod ti doktor, “Sir, apay ta agap-apurakayo launay? Anya ti mabaliwan iti kasasaad daytoy nga ubing?”

Kasapulan ni Beatriz ti maopera tapno maikabil ti prosthesis iti lugar a nakaikkatan ti tulang iti bungona. Naalami ti patta-patta a (Brazilian Real) \$147,500.00 (nganngani \$60,000.00 USD). Awan kadakami ti kwarta, isu nga adda manen sabali a rason tapno agkararag. Iti pannakaawatmi kadagiti pannakaidalan manipud iti Dios babaen iti maysa a gayyem, rinuggianmi ti nagkampanya tapno mapaaddami dayta a kwarta. Iti maysa a Huwebes, nakaawatak iti tawag. Maysa a babai a nangrugi a nagsaludsod maipapan ken ni Beatriz. Sinaludsodna no mano pay ti kasapulanmi, ket kunak (BRL) \$57,000.00 (\$23,000.00 USD). Kunana a kitaenna no adda maaramidanna a banag para kadakami. Iti sumaruno a Lunes, idi napanak iti bangko tapno iruarko ti balanse, nadiskobrek a dayta a tao ket nangidiposito iti gatad a kasapulanmi. Iti uneg ti 40 nga aldaw nabaelanmi a napaadda ti tunggal kwarta a kasapulanmi. Madaydayaw ti Dios!

Napasamak ti operasion idi Disyembre 23, 2011. Iti dayta a kanito, mabaelanen ni Beatriz ti agtugaw babaen iti tulong ti sumagmamano a pungan ken makatugaw metten isuna iti wheelchair. Idi Disyembre 27, napanak nagpakada ken ni Beatriz sakbay a mapanak idiy simbaan. Iniggamak ti imana ket imbagak a mapanak idiy simbaan. Nariknak idi a guyguyudenna ti imak. Iniggamak isuna a sipipigsa ket namnaminsan a timmakder isuna. Nakigtotak ket nagatrasak, ket iti isu met laeng a kanito, nagaskaw manen isuna a nagpasango ket nagtultuloy a nagna. Matalek ti Dios!

Kas naglabas dagiti aldaw, nagtultuloy a napasubli ni Beatriz dagiti abilidadna. Rinuggianna ti nagsao ken nagsurat. Idi Mayo 2012, nagsubli isuna iti pagadalan.

Ita, kalpasan ti tallo a tawen, isuna ket sibibiag a testimonio iti labes ti gagangay a mirakulo, pammaneknek a napudno ti Dios iti Saona ken agtigtignay iti pabor kadagidiay a mamati. Ti sao nga adda kaniak para iti biagmo iti amin a kanito ket, “AMIN A BANAG MABALIN CADAGITI MAMMATI” (Marcos 9:23).

Sumagmamano nga aldaw ti napalabas, kadwa ti asawak ti maysa a physical therapist, ket ipakpakita ti doktor ni Beatriz iti maysa kadagiti estudiantena ken kunana, “Daytoy ket milagro, gapu ta no saan a gapu iti Dios, awan koma isuna ditoy. Awan ti maaramidan ti agas kenkuana.”

Awan ti maaramidan ti agas, ngem KABAELAN TI DIOS! MAKAPAGTIGNAY MET ITI BIAGMO!

Pastor Isaque Roberto

Daytoy a testimonio ket naibingay iti entero nga iglesia idiy Londrina ket nagbalin nga ehemplo iti pannakabalin ti Dios a mangkarit iti pammatitayo. Buyaem iti YouTube ti testimonio nga inrekordmi idiy simbaan: <http://www.youtube.com/watch?v=YHqbBk0A4nA>.